

浙江圖書館



811.17
3452

浙江省立	
圖書館	
登記 號	125058
分類 號	
冊	3




浙江圖書館



浙江圖書館



浙江圖書館



浙江圖書館



浙江圖書館

寓舟詩集卷之四

秀水沈青崖良思父著



甲寅

館

祝陽湖大冢宰陝西制府劉公六表

九邊開重鎮五福集元公

御書福字至甲寅元旦
賜五幅矣台

曜疑丞密天卿節制雄拳龍綿海上吐鳳著江東蒞榜驂

騶捷藜光宛委通槐廳晴映綠蓮炬夜分紅藻鑑汾西朗

鹽車代北空京坻培國脉獻納稱皇衷肅輦王畿

豸鋤豪司隸驄教倉輸穗粘潞曲集艤艫握筴蠹先避持

籌廩日克以茲會計當更沐寵恩隆青海星槎駛橫

門鳳詔逢肅清拜真長簡要擬王戎飛旆綏沂濟留縉

官弁言集 卷四
一
惠嶧蒙鱗魴懷采衛鎖鑰筦圻同秋憲臯謨懋春和禹服
融仁人能重任儒者自多功分陝仔肩大籌邊掌握崇油
幢馳塞上龍節殿關中醪纒柔犀兕及斯練虎熊興屯充
國富轉餉鄩侯忠築堠千夫力營城百堵工授屢回紇類
安宅吐番鴻 錫予頒蕃庶宣揚振贖孽防秋烽火密

遊牧草湖豐伐輻材堅韌穿渠澤沛洪日融春浩蕩山飽
雪龍從民力勤趨役天心助屢豐陳謨昭 廟算亮采

契 宸聰聞望尊圭璧威儀賦梓桐霽懷常爽豁休度
自虛冲宣室儲調鼎祁連祝挂弓傳衣邁繡席肯構發蘭
叢竹帛麟開閣蓬瀛鶴衛宮慶雲常藹藹紫氣隱葱葱當
代欽申甫斯辰仰華嵩相毛邀顧睞獻璞感磨礱蓮幕沾

時雨鈴轅坐惠風河寬彌潤澤天咫荷併幪願製采芝曲

長娛華皓翁

歸愚云鋪敘有倫對仗工整如少陵上哥舒翰汝陽王諸作

酒泉觀察署中有卧柳一樹姚椿莊副使每至必哦

其側且要余同賦

高柳行新多壁立

亭子用工部高柳著行新句類曰行新

一株獨卧淥池汀

依橋作檻長虹勢覆艇為窩偃蓋形彭澤在官腰欲折灞

陵欹岸眼常青撫摩共賞三眠態何日枯槎載使星

五日黃雪鴻廉察招集姚椿莊張雲如王文毅小叙

行新亭醉呈諸公

浙

酒泉廉訪好置酒坐客如雲皆勝友閒時過從轄嘗投况

復天中插蒲柳

肅俗五日門闌競插柳枝

直排行馬入西園為愛清池

方半畝舞雪飛綿萬綠齊莫負良辰杯在手名釀紛陳別

聖賢一罇中衛藏之久河西酒以中衛為第一興酣塵禿晉人風更

雜吳歛兼擊缶生平不憚玉門遙我輩豪襟曾未有碧潯

紅峽說榆關指榆林太守丙穴金牛傳漢右椿莊分巡漢興受事四載而實未履

漢中公署宦轍斯時不自由那復戀鄉終老牖綃纏玉臂摘安

榴棹轉芳塘雪細藕此日江南洵可娛吟情猶在邊陲後

諸公聽我醉時歌為我開顏酌大斗

西路從軍樂

中朝新拜漢嫖姚壁壘旌旗出絳霄十萬朱綬齊整肅

九天綸綍咏弓昭大將軍查以十年秋授鉞

哈密山陰築大城雄兵環駐度遼營北邊海北居延潤月

下牽駝飲水清

營北即巴里坤海子

斥堠森嚴遍打班先鋒報敵匿前山指揮兩翼圍將去釜

底遊魚繫頸還

十一年秋官大將軍查大冢宰親巡卡路獲賊五十餘人斬馘極夥

禁旅精強號健兒諸藩台吉各分旗更饒方鎮羅虢虎王

帳新猷見握奇

消融雪水到營前荷鍤開渠試灌田種得青稞高廩積始

知充國善籌邊

仁君字小愛黎元族帳移回吐魯番新築瓜沙豐水草一

般城堡樂田園

夜鳴刁斗枕琯戈浩氣平吞伊麗河

賊巢之阻

賴有混沌

平聲生剝

圖牛羊皮爲之

當舟楫成功應較木罌多

龍文畫盾滾長刀射遠穿楊韞短甬更鑄新頒鑽不刺鎗名
封狐從此定傾巢

夏衣纔送又冬裘縫綴無勞戍婦愁俱係營中代置古磧雪深能

度馬卡倫諸將各防秋

幾萬輪蹄競轉輸黃梁炊飯乳熬酥閒來射獵南山下刺

倒元熊肉滿厨

驍勇新從禁旅挑頭銜半插侍中貂一軍齊號巴圖魯清書

勇也汗血全能翊 聖朝

材官竒伎集京城六郡良家勇健營免胄喜教鳴鏑射聳

肩偏向石頭迎

戎衣短後錦征袍猛將腰間大食刀金鏤新裝紅柳鞞哥

舒夜佩壓群豪

關中纜造劈山雷粵嶠還馱九節來

粵東撫軍鄂公進九節銅礮有螺纏紋奏

合為一大砲可擊三十里

鶴膝螺紋憑一炬遙聞天狗墮黃埃

馬潼噴雪飲酸漿常割單于雙尾羊昨夜

御塘頒克

食軍中將士盡分嘗

西域雕樓十丈高凝眸遠覽運龍韜兩山競報平安燧知

是西夷欲貢契

歸愚云切定本朝西陲不作泛常塞下曲是作者獨到處

乙卯

出嘉峪關

甌脫泥封仗一丸漢庭無復護烏桓燉煌

郡在今沙瓜州域內久棄

消寒地布魯

湖名在黑山湖之西

旋為飲馬灘自有車書通漠北更

逢千羽舞

朝端天山總在籓籬內飛旆長驅縱目看

赤金所

左湖右峽繞巘城雪嶠凌晨粉黛明久練戍兵馳馬禦新
招烟戶課牛耕已開道路通王會自有鶯花動客情慷慨
每吟靡盬句雙旌獵獵一鐔橫

過靖逆呈張田莘布政

三里新城舊罕東

原名達爾兔即明季罕東衛地

兩渠滌抱肇田功

初昌馬湖

水西流自康熙中相度築壩於衛西始開東西兩渠下流與疏勒河會而屯田戶民乃盛

雨催鮮蔬銀

盤墨

地產蘑菇似銀盤久之變黑色

風颭柔枝柳線紅山下開屯雞塞熟

湖濱歸馬鷺亭雄

布魯洋帶兩湖在衛北可為牧場總督武進劉公築墩十八座以扞其外更

逢博望持籌策不與尋常充國同

橋灣城壘前韻

數雉真成一彈丸停驂荒服且盤桓兩山對鎖東西峽東有

赤金峽西有星星十水爭流上下灘靖逆柳溝兩衛有十道溝俱自南來流入

疏勒回鶻犁鋤環塞外敖倉芻粟入雲端從今款貢烽烟

靖襟帶清流倚檻看歸愚云字字響亮

大風行



噫嘻恠哉西極大風何從來旋天吼地聲如雷恐是騰蛇

噓氣揭石磧抑或號虎振毛嘯陰霾陸海擁潮砂作浪赭

烟結霧砵飛埃冥二摩旛勢不息大王逞雄鼓神力萬鬼

啾嘈各戲遊空中噴激射江域車騎狂奔自突衝羸駝悲

嘶如退鷁行人蜩縮任搏扶墮地無言口鼻塞三十六旬

陽烏閤颺母推盪妖墓蝕我欲召雨師洒潤傾瑤池我欲
檄后羿關弓殪封豨又聞鮫宮有奇寶珠光鎮定群氛埽
博得鈞天號令收旋見羲輪輝愈皎萬籟無聲條不鳴西
陸咸頌太平好

自題憶南湖圖四十韻

嘉禾諸水秀結構在南湖葱鬱人皆占精神我獨於釣遊
當弱冠夢想已衰軀未得歸田里何妨寄畫圖鶯散常聒
耳花片欲侵鬚短草尋漁市單衫問酒壚茆亭遮五柳蘆
渚宿雙鳧鐙岸星光雜風鈴塔影孤綺羅推越艷簫鼓擅
吳飲雀舫芙蓉淀蘭橈翡翠襦剡溪憑月照蔣逕倩花扶
春媚烟籠杏秋淒雨滴梧稻肥添蟹斲芋熟課菱租泥滑

觀秧馬霜酣綻木奴裴公栽竹院坡老煮茶鑪勝地真堪
戀遙情尚可摹自攜題柱筆旋棄出關繻偃蹇身猶賤藏
修道未腴每憐岐路泣恒凜素衣污歲月虛雕葉文章待
守株十年登日觀萬卷歷天衢魚鳥親 仙籟風光數
帝都我生饒樂事所蒞亦名區杜曲芰荷滿豐川荇藻鋪
漢陂紫閣下輞水玉山隅按部曾流覽端居獨尠娛因思
人閱世無異隙馳駒攬鏡驚潘髻乘軒濫楚竽立三誰不
朽主一自甘愚欲借丹青手爲傳鈍拙夫添毫仍瘦怯點
漆愈清癯惟有疑思處纔能位置吾閒雲常繞岫倦翻識
歸途緗帙千函蠹桑園十畝蕪名場何日饜宦海任人驅
漫羨蕭何績休貪李愬諛倏從金穴過旋向玉關趨跡比

槐柯幻情同蜨翅迂形生憑翰墨意趣託尊鱸願指寰瀛
楫先尋縮地壺

即事

屈曲清漪自蜿蟺西流直到党河邊因思王濬浮江梯便

向河湄試革船

党河在沙州之西北流與蘓勒河俱流入
河沙石而沒岳故帥欲開通二河合流

造舟運糧而不果余相度河流用河蘭牛羊皮渾脫數手
鼓氣實糧其中順流而下達安西鎮城凡二百餘里可少

節車馬
之力

榛莽初披斥鹵區朽材曾不中薪樗忽看僵柳如人立智

井灰深歷劫餘

塞外紅柳根蟠地最深樵者引火焚之數
月不息靖逆有窟寵河地下潛燒灰燼綿

延數十里人馬俱墮深壑其
小者掘地亦可獲炭數窖

懷姚鈞風觀察

真率姚夫子平生淡泊安心田多坦直骨相不寒酸公任兵部

郎上召見顧張相曰人言姚培和貌相寒酸殊不爾也遂簡河東鹽運勤比陶陰惜憂知

范樂難萍蓬得佳友詩酒亦餘歡

宦跡如風籜無端竟出關曠懷澄月沼公調漢興接治疆理沙州事沙有半

月泉前對鳴沙山風起沙湧而泉不染塵公嘗構亭其上暇輒吟咏好句積沙山持節三年

滯飛符一月還我思隨羸馬晴樹漢江灣公遊歷塞外怯乘快馬太守童

心朴有詩云近聞出塞姚觀察騎馬如乘雙漿船蓋實錄也

南山松

軍中醫院推察藥性採松皮熬汁成膏號曰松齡

以貽同志因歌以紀之

南山松百里陰翳車師東叅天拔地如虬龍合抱豈止十

數圍拜爵已受千年封其間最古之老樹或曾閱歷漢唐
平西戎山椒據險築營壘牧夫樵採孫枝空金戈鐵馬恣
蹂躪燎原不盡仍青葱茯苓蟠其根蒼鼠遊其叢鱗甲裹
曾冰柯條撼朔風王師十萬征西域伊吾直走陽關通中
材相度構廣厦大材擁腫莫可攻剝取霜皮厚三尺花紋
蘚蝕胭脂紅宋斤魯削成異彩軍城製作几筵供下餘木
屑香且艷清泉亂沸霞光濃更調乳酥入穹帳臭味竟與
團茶同養榮益衛滋臟腑服食常覺精神融玉華金液任
君餌願躡鹿皮仇季之仙蹤

張莘村云如金翅
搏風摩空自適

丙辰

柔遠亭

古塞通西域，巘城接大荒。一亭聊駐馬，萬里此離觴。風勁草痕白，山寒日影黃。征夫折鞭去，前路少垂楊。

二

嘉峪分天塹，籌邊陋昔人。斯亭纔結構，西旅即來賓。庭雜烏孫坐，墀牽汗血馴。與樓常對峙，獨喜靖胡塵。

述事

圖

戈鋌將息羽，書希相國當。關解兕犀佩，刀猛將橫青。蜺執戟，星郎耀紫微。塞上猶留典，屬國護羗善。後足兵食三年，借箸紛胸臆。使我不得親翰墨，昨聞虜使上神京。輪臺在穆魯烏素定界，永休兵。河湟父老齊懽聲，丁男努力事春耕。邇來大地陽春徧，柳甲花苞同赤縣。舫屋晴窗思展卷，行篋

多無五車便著意搜求購數編沙塵十斛頓浣湔况遇春

風亭上賢

相國西林鄂公旬宣江蘓主持風雅萃碩彥盛元珍等數十人于春風亭唱和成帙今盛適在

酒 泉論文絕域兼籌邊

歸愚云連下韻蹀躞不羈

經畧苗疆

聞道黔江路未通

朝廷推轂重師中百蠻久在要荒

列七縱還須教化崇武庫征南潭浸碣伏波平粵柱鎔銅

玉門新績威名遠定埒前賢策大功

苗疆報捷

將軍勝算祖留侯三路雄兵下古州銅鼓轟雷傾蟻穴繡

旗開瘴縛蠻酋夜郎剖竹羈縻慣粵尉遺書職貢修但願

聖恩寬似海五溪從此盡安流

錢博士

登俊

贈西域地圖

客從軍中來貽我盈丈紙展卷列丹青大荒靡涯涘嵯峨
于闐山蜿蟺伊丽水輪臺及陽關如在掌上指漢唐殊名
稱回夷互遷徙服叛靡有常古來多戰壘白骨沉沙窩金
刀折澗底寒暄異中華幅幘空萬里有壤不可耕得民不
可使唐虞教訖西被流沙止聚米雖良謀形勢何足恃
素壁張斯圖聊識大亥趾

歸愚云正論即所云得地
不足耕殺人以為功也

憶子

小兒纔十五負笈上

皇都

鳳詔童科廣螢窗墨義

麤習飛無遠翮學步愧名駒此日春風裏琴書已戒途

定羌廟

廟在山丹東爲涼肅二鎮界明季祠漢武安王

本朝王將軍進寶平寇 神助顯應其子用予復

鎮守其地重修廟宇立碑繪壁紀厥功焉

河右羌戎雜由來戰壘多神靈初奠鼎忠勇

王公謚

正提戈

一脈遙相授千秋共不磨壯猷良史記英颯畫工摩峽鎖
藩籬固香焚廟貌峩書生下肅拜籌議近如何

郭恬菴臬使高坐愚觀察同遊涼城北海藏寺倡酌

追和原韻

招提佳境訂看花驄馬聯鑣小隊斜酒盞肯教紅粉勸藥
欄還藉翠幃遮鄴侯歸國猶持策去病臨邊不顧家詩興
正饒泉味永松濤聲裏碎沉霞

狄臺懷古

在涼州城東

武襄智勇冠當年古壘於今尚兀然自有撒錢傳簡冊

招狄

討行軍嘗撒百錢皆陽文以鼓軍氣凱旋日始起視

不須銘鼓壯山川燐侵舊寨連

衰草夕照荒臺冑野烟天聖若教留柱石肯容西夏此鼾眠

長城曲



河西長城千里長北邊脩胡南防羌兩山合挹川路窄野
水衝流短垣圻墩軍拆擊迎長官十餘年來烽火息番夫
爲我牧牛羊番婦絡髮來市易邊氓安堵事鋤犁麥塚高
與崇墉齊群雞飛上城頭棲

張芎村云此曲風調格律俱樞少陵

塞下曲

君王神武重息戰，鸞書飛下蓬萊殿。雄兵十萬凱歌還，碁布關河充組練。車師直北築大城，伊州迤東開渠堰。戍士年年粟有餘，農夫翻嫌糶價賤。上年一斛直十千，今年種穀無多錢。但願縣官糶官糶，鄉村纔得泉刀足。曉峰云香山後身

穀輓行

車穀輓一輪，九輞十八輻。閒時逐販夫，邇年輓官粟。縣官給我封椿錢，歲有贏餘添買犢。更憫我儕供軍儲，屢詔蠲租兼賜復。昨年忽報虜酋平，戍兵退舍哈密城。蔡湖水足田可畊，河西丁壯歸南畝。僕夫不向沙場走，勸君且莫伐車材。檀榆穀輓村村有。

白馬篇

白馬本來非駿骨伯樂一顧增顏色旋向天閑乞散材一
朝驅使居延北不配將軍斬左賢却令教倉轉軍食大車
轂轆五尺高此馬駕轅平八尺或言負重非所長白馬聞
之空歎息世稱騏驥貴馴良吾能用力成吾德軍門不聞
庚癸呼汗血垂枯瘦露肋歸來退入凡馬郡監官廝養尚
能識阜櫪低頭不敢嘶眼見新駒施玉勒

石燕

石本無情物何爲化燕形峽雲生鳥翼塞雨動龍腥下上
依稀似呢喃未足聽雙栖沙穴穩王謝豈居停

題蘭州金山寺

金城城北金山寺萬里黃河山下流雙目未能窮九曲不

辭更上十層樓

金城城北金山寺却似焦山對面山一樣水聲流不息只

輸遠上白雲間

館

遊五泉次張十九方齋前輩韻

來山閣上聽泉流
濺玉跳珠近案頭
白塔影隨飛雁小
黃河勢與遠山浮
重岡雲氣徐歸岫
隔岸鍾磬直到樓
關塞數年戎馬慣
塵襟何幸占清幽

偕李東樊高坐愚兩觀察同遊金天觀

左控樺林右龍尾
仙袖翩翩拂霞起

觀前有水名袖川碑
載形家言此山有仙

人舞袖之
勢故名

銀潢遠洩星宿源
奔流直到滄海止
金城西畔

少滌洄灘頭爭注阿干水

阿于水自南
來入于河

貝闕瓊樓縹緲間

關門望之氣常紫招邀劉阮恣探奇凌虛先度仙梁始雲
生小洞潤芝苗風過空庭落松子半日煩囂暫滌除試歎
元關揖道士王喬爲我述參同危微卽是希夷旨養生有
主訪蒙莊大道無名宗柱史從來造化鮮停機古往今來
一瞬爾君不見九陽山上憑高望黃河白日流行駛

九陽山觀

後之高
阜名

丁巳

蘭州看花卽事

十里秦川萬樹花晴霞滿隴寺門遮鷺黃高柳成行處翠
幙紅樓盡酒家

閻闔篇

帝居在何所端拱闕太清俯眎九州渺一丸莫震瀛道遠
靡終極噓氣騰杳冥雙闕矗萬丈朱扉輝曜靈龍虎守外
闈瑤華森中庭昔陪玉樞相常近香案行被服襲霓彩雜
佩鏘葱珩列星皆察友容與坐東榮忽思撫仙掌迴飈降
雲駢疇知入塵世兩脇不復輕跬步生險阻發機寓諍爭
澄慮養吾道太上貴忘情屏息漱沆瀣引領茹日精浮雲
豈長蔽昂首當見青閭闔洞豁達凌虛遊鳳城

阿干

金城南去洮陽近雲暗溪河度紇干老馬漫稱能識路不
知何處是長安

臨洮

馬銜山名通隴坂洮水下熙州地作金城障山爲玉壘浮西

平留壯畧郿伯尚英謀橫渠張子欲結奏凱經巖郡毛生

悔早投

奉陪松莊相國雙楸中丞蓮花池觀水車

稷高勤民事聯輿漢上遊既探溝洫利洮河大通河莊浪河俱濬渠溉田

還訪桔槔謀匠運機關巧農知胼胝優緣梯噴素練轉軸

浸青疇楊柳宜當暑芙蓉待隔秋池以蓮名而實無蓮中丞擬於明歲種藕擬

修觀稼閣勝倚望河樓中丞署舊有望河樓今新葺曲港魚罾入輕濤

馬革浮隄外即黃河渡者俱用牛羊皮混沌爲筏即古馬革船也瞻蒲思勸課望雨預

綢繆隨處百川注應教萬斛收從今有虹吸不復禱龍湫

題軍諮祭酒郭恬菴回軍圖二十韻

景純仙裔蓬山近忠武家聲麟閣高德業不緣承世祿才
華自合占人豪吳頭楚尾經三仕塞上軍中諳六韜帷幄
機宜陪上將倉箱儲蓄領農曹米家書畫兼橫槊羊氏衣
裘稱佩刀公詩有顧影驚疑見佩刀之句惠普熊羆如割狙恩覃犀兕欲
投醪因山築壘封丸土融雪成渠皺縠濤褒鄂公侯馳勇
畧應劉賓佐話風騷親教戎纛圍毳帳數見轅門射錦袍
白髮久拚居朔漠黑甜無夢到神皋忽傳北闕停驅豹旋
報西戎願貢爨競奏伊涼吹箏篋共傾醽醁醉葡萄華陽
草茂宜歸馬祁嶺風和看捲旄 天子曰咨嘉乃績先
生稽首讓無勞淵明冷淡籬邊菊方朔精神海上桃為有
英名能怖虜須將古貌特添毫探微筆底平淮頌道子圖

中破陣操七萃班師鐫鼓碣五紇退食咏弓橐山樵已辦

劇雲斧恬菴自號一箇山樵陸舫將撐漲水篙歸到玉門應與共太

平歌咏樂陶陶

秋月豔曲六首

杜砥峯妾名秋月

秋來愛月情却比愛花重雙手掬清池願將月兒弄

三五蟾光滿簷前靈鵲報瓜果陳中庭明月入懷抱

人言秋月朗秋月使人愁忽被白雲掩清光不復流

金飈促靈駕竊葯飛上天人間歌破鏡月缺幾時圓

君義關山高妾情隴水流明月空相照何日大刀頭

團團憶儂貌纖纖似儂眉此夜揚輝處不知流照誰

餘韻悠然

過涼州宿粵東提督李鎮鼎空宅時將鬻為司馬官

高十行
卷四
古

署感而有作

上將功成營美宅高門廣厦峙銅街鳴鐘饌玉三千履開
鏡熒星十二釵梁落燕泥賓榻設窓除蛛網吏衙排眼前
金碧終須朽逆旅徒增一滄懷

雙井望肅州

日落霞沈紫塞紅雄圖曾記峪關東天山不盡橫雲淡先

見文殊

山名在肅城南似卧弓

征車來往歲華流笑指祁連似白頭今日數莖侵客鬢空
嗟騎省未封侯

柔遠亭

烽烟靖後一亭孤衰柳寒泉噪野鳥客到宛然成舊跡前

年曾此送征夫

千古天驕未易平封侯盡覓此途行
自從小築旗亭後不向關門唱渭城

酒泉豔歌行

爲程留
香作

焉者之山高無極山前婦女多顏色
單于選取壓毛嬙猩鬪貂蟬宮樣飾
葡萄美酒點醅酥春融漸上天桃膚
簪葉聲聲催舞袖嬌花萬朶圍穹廬
匈奴臂斷二千載豔冶妖閑渾不改
膩粉香脂雜鼓鞀秦箏羌笛陪鞀鼓
鞀鼓鞀鼓覓封侯那復多情戀翠樓
裊裊春風玉門度路旁桃李不知愁
小家碧玉垂鬟早仙姿更賽吳娃好
襄王客夢到巫峰此生願向溫柔老
苞含豆蔻破瓜初春鶯啼澀香留餘

延年女弟慕容姊宛轉雙飛人不如紫臺萬里關山月笳
拍餘音猶未歇他日攜歸響屨廊粉痕似帶祁連雪

立春日酒泉宴哈密戍帥王都督

邦寧

謀帥新推詩禮才樓船初向玉關來豪襟喜有泉如酒勝
地嘗將雪作梅人在秦中能擊缶客逢春到且銜杯暖風
次第陽關去看取瓜期得意回

冬夜讀易

嚴冬處窮塞兀坐想天根亥末藏其亥子初旋復元以此
迭運理內與吾心捫木萌象始震土厚賴純坤七日剛既
反載陽如朝暾滋培漸甲拆百卉盈春園遍遊三十六養
性道義門直入安樂窩豈能窺籬樊

曉峰云玩木萌等
句先生於易深矣

旅冬雜詠五首

朔風號古塞歲暮傷客心倦遊敝狐白常苦霜雪侵迴念
我鄉里路遠不可尋夢中理孤棹一往湖山深

秦臘未告畢秦爻已來蘓興懷風人旨蟋蟀鳴堂除君子
猶不樂太康匪所居寧知玉關客中心畏簡書二月冰未
泮三月柳未舒春風歸獨遲歲晏當何如

飢鳥立城陴啞啞鳴中夜明月照紫臺清光靜如瀉客子
不成寐披裘立庭下結髮志四方故人揮手謝遠遊寧足
憚疇昔誰勸駕

浙

良馬馳流沙寧爲戀芻菽征鴻振遠音胡爲遵渚陸人生
若長聚齷齪同麋鹿所以蹇蹇臣道路常往復疾風凋朱

顏曾冰摧華轂邊庭苦行役坐致阮生哭豈無肥遯翁高
卧樂邁軸君子不辭瘁永貞盟幽獨

北斗挂邊城南山當窓牖秦月及漢關斷臂由來久而我
值清時從王蒞河右浩氣吞左賢彎弓乏妙手寒威詎足
辭况有盈尊酒

問花



曾在臯蘭種水仙手排白石注清泉顆如犀蒜含芳澤莖
比藍芽透玉田莫近韓香爐火畔須烘趙日紙窗前冰姿
待得春風到素靨檀心別樣妍

再問花

斗大瓷缸半尺泥曾將鄆杜藕根移波心未鑄青銅鏡鮫

室先縑白玉絲擬與濂溪分
獨愛更思洛浦遇幽姿
三冬緹室含春意應有田田貼水時

李提督

繩武

畫鷹絕佳時將駐師
哈密設色之筆不

能立索詩以訂之

柱史昂孫道德宗
珥貂累葉皆攀龍
鬚眉褒鄂關河壯
身是凌烟畫裏容
政事才華推第一
公餘妙擅丹青筆
鶯溪十丈兔毫濡
惟有蒼鷹更無匹
錦綵鈿鎖綠沉牀
颯颯雄姿氣振揚
玉爪拿雲鋒
鋒利金眸轉電威
稜藏月令當秋
隼始擊扶搏直展
干霄翼即今安坐
臂鞬時已使郊原
狐兔息古來將相
重名賢鎖鑰巖疆
任獨專玉帳論兵
酋虜讐亦如豐羽
能高騫葉公好龍
支遁馬神駿飛騰
不易寫

鑄鼎非徒肖厥形百物生機恣揮洒我於河右公卿間玩
君墨寶欽高山肅拜皈依磨盾鼻願得寸珠光照顏

柳烟

館

雨織風縑萬縷絲拖藍蘸黛總離離朦朧樓閣疎偏好掩
映帆檣淡更宜霧罨隋隄遊目處晴薰灞岸斷腸時綠雲
冉冉春光暮隨在關河一片迷

浙江

寓舟詩集卷之五

秀水沈青崖良思父著

戊午

清明

清明小雨細如絲恰趁輕風濕柳枝此景酒泉曾未見津
莖潤葉太平時

杏倚牆東乍放花更饒新雨暈紅霞漢宮蠟燭和烟散也

照陽關戍士家

歸愚云
溫厚

廉纖酥雨濕天街早潤琴書暢客懷何處

期鬪草香

閨辜負踏青鞋

奉陪松莊相國酒泉閱兵

相國持龍節軍容塞上嚴九邊齊號令八陣

天山朗陽和細柳纖鳴鼉嫺步伐摩旌識

熟騰驤馬亦恬轟雷飛礮遠舞雪點矛小

員天地兼鶯聲橫吹和花片繡旗粘玉帳

續添賓僚參幄議佩劍看調鹽

歸愚云有地中
角天上下將軍之概

送李提督繩武統師哈密

聖化流沙被訃謨瀚海平籌邊多勝算謀帥得奇英韜略

衛公富詩書鄴架盈薇垣尊上將蓮嶽應長庚地闢十千

耦胸藏百萬兵擁旌都護府浙賜鉞度遼營古磧分天

塹雄關壯戍城祁連迷雪影細柳聽鶯聲豐草依羣牧平

疇按伍耕投壺徵雅趣揮翰足怡情刁斗臨淮肅鋒車驃

騎輕壯猷經借箸減律本和羹闔外榮 三錫師中協八

卿伊吾通貢道蒲類拱 神京從此紓 西顧凌烟策大

名曉峰云酷似唐人長排

酒泉見燕

春社過來已月餘燕飛纔到玉門初弱翎應怯征途遠何

似鄉園守舊廬

雉媒詞

虞人張網羅所得患不多一朝獲鳴雉豢如鴛鴦飲啄

性既馴求牡聲相和使之引同類翻飛近 須臾被贈

繳對面興干戈吁嗟雉固愚智者當若何

虎張詞

雷方詩集 卷五
猛虎食人嚼其肉復令魂魄來肆毒為虎前
人服嗚呼天地嘗好生乃使鬼魅害同族磨牙吮血傷人所利而徒果饕餮之腹

偶與蔣敬持孝廉縱談擬卜築洞庭山辱貽以詩依

韻酬之二首

汎汎孤舟客中流喚奈何乾坤滿贈繳湖海自風波萬頃水精域兩山叢桂阿洞庭有東西兩山具區容蟹舍相約片帆過

七十二峰上凌虛獨浩然無心求出世有客可談予常浥

金尊月時邀玉柱仙太湖中有金房玉柱山為仙人往來之所愁無買山鏹空

羨五湖煙

夜聞黃河聲

萬籟今宵寂河聲帶月流怒潮侵枕畔濁浪過磯頭目極
三門險魂驚九曲愁迴鐙思眺望客子倦登樓

寄題五泉

黃葉尋僧逕飛泉和梵經時携一尊酒共坐半山亭隱几
翠微在褰帷紺殿扃不因人事阻湍急自泠泠

秋夕微雨

小雨驅殘暑颯然秋滿庭梧飄初墮井螢坐欲侵屏山色
當窻爽鐘聲向夕暝閒來掩葵扇兩腋尚泠泠

秋鷹感賦

秋旻初拭玻璃淨仰見搏空一鷗飛側眼直窺石草細竦
身斜破薄雲微乘時始擊能知候發縱因人一兒幾狐兔

宮兵言集 卷五
滿原搜不盡却憐好鳥轉無依

聞王副使

全臣

內召

浮雲蔽青天大風能撥之朔雪積川陸會有見
現時憶昔

西征日明公任軍諮王師擊刁斗竈烟待農司

公時為行營戶部

關中轉漕者飛輓偏後期徒旅呼庚癸沙場偶語隨大帥

謀議沮巧炊靡所施公乃展碩畫號召諸市兒君輩屠販

侶各各挾重資今當阻飢日唱籌詎可欺拔刃紛人臂原

野縱熊羆身命且不保錢財寧有遺願與公等約百貨暫

貸移官為給符驗觴豆供朶頤

時軍中絕糧而市廛有酒食故公為權宜計耳

六師既得飽七旬安恬熙詎知引繩吏不咎餉到遲而以矯

擅罪索彼毛有疵坐贓八十萬南冠旋繫維家私遭沒入

公勩沒僅有七白金沉淪良足悲
蟲鶴皆啣感羣情載口碑
疇謂

九重遠咫尺
天聽卑老成餘碩果
剝極復可知大

蠅集丹筆蠲釋盡毫釐
更以安車寵
召見杖國耆忽

傳降
綸綍朝野咸伸眉
天道有還理傾擠徒爾為尺

蠖豈常屈蟾光不久虧
內省昔宣力匪躬堅自持
風波險不測中心恒坦夷
以此風有位感激垂涕洟

未得偕遊夜雨岩悵然有作仍次敬持韻

南臯十里餘不惜馬蹄遠
行行漸幽勝仄徑依林轉
河壩氣早爽秋雨迎人善
紅葉染初殷白雲空際卷
隨筓覓泉源尋僧共踈散
上年來眺聽幾度忘我嬾
歎薄濕襟袖掬飲弄落蘚
曲澗可流觴石髮梳清淺
以我龍井茶試烹味

雷方詩集 卷三
逾澹岩雨無晴時人事有遷變枕漱舊訂約陪遊未得踐
把詩再三讀逸興倍難遣

河橋鐵柱歌

館

洪武五年宋國公馮勝鑄造

金城天險憑洪河萬古湯湯卷濁波伊維炎漢開四郡班
霍雄師罌渡多明初畧地河西兵雲臺馮鄧來專征桓桓
宋公獨先至關西父老壺漿迎安集哀鴻惠商旅涉川之
利木道行齒排巨艦二十四聯作浮梁如鱉橫鐵索紆蟠
百廿丈山麓誰能鑿石鯨爰乃范金作大柱徑尺圍三崇
比樹坎穴深埋列岸孺銀漢曾占四星聚長絙繫維鰲極
寧天吳有力難跋扈何年雷雨起南臯一柱化龍忽飛去

至今鼎足尚撐拄直以騫槎擊河鼓

河鼓三星在天河中

我來平步

履安瀾拂拭泥沙仔細看上紀洪武下公諱擬與伏波同
不刊嗚呼國家任將相濟川舟楫慰民望設如九曲天上
來丞徒豈能敵巨浪賴有徽纆束柱牢共濟艱難為保障
邇來操楫鮮遠識自恃盪舟有奇力埠頭椽杙日丁丁幾
番洶湧陷不測繼今願師古之人千秋鼎峙鱗膚皴屹然
鎮此斗牛津

鴟鴞

晨興乾鵲鳴喜色上眉宇中夜聞鴟鷂惡聲厭煩苦是豈
人心偏愛憎實惟物情所自取嗟彼鴟鴞毀卵破巢肆毒
同儕猶未足翻身殺母食其肉啄腦屠腸等腐鼠他日生

雛還殺汝狸頭鬼目自不祥於人休咎庸何傷為我讖有
庭氏毋持射日弓勿挾救月矢妖鳥殺不盡豺狼虺蜴漫
天是君不見前戮蚩尤後蜚廉凶邪代代污青史

歸愚云
似太白

答蔣孝廉見贈原韻

蒼旻有彗孛人生遭讒謗廣野現樓臺倏忽成幻妄介子
入山焚靈均澤畔放達觀等坦夷賦恨徒悽愴束髮始受
書寧靜恢器量筮仕值清時志節期相尚蹇二占匪躬守
貞不求諒一朝艱鉅投擔荷敢牢讓

宸衷西顧憂王

師重籌餉騰驤騎百羣脂轄車千兩御運治焚絲徵調宜
得當二矛誇重英二弓備交鞬軍中凡百需轉輸莫敢抗
鶴鳴不升天虎吼獨騰上溜澠罔攸分倒戈還相向撫拾

貝錦文一一為繪狀曾母且投杼何當白簡誑聰明寄耳
目吐納責喉吭國是任稊稜顛倒紛推盪辛苦褫鞶帶道
遙錫卣鬯日華方東昇

皇風貴遐暢吾身滄海粟何

關得與喪所嗟刑政乖臨風慨以慷在昔有劉韓播潮投
蠻瘴高處不勝寒歌調猶悲壯古賢皆可師中心常養養
與君初結交述事勝諮訪贈言知我懷簞笠與期望廟犧
被繡文朝馬立仙仗以身殉芻豢所見胡不廣苟能脫羈
紲自然生排宕扁舟任所如飄泊靡依傍湖山踐舊盟釣
遊尤弗忘出險灑瀕堆驚魂溯陸舫安得從良朋分牋恣
酌唱狂叫搜奇文爛醉縱佳釀清泉白石間置我偕閒曠
君品合清華唾手取儲相廊廟而山林次第不相妨載筆

賡明良莫倣予直躔驥子騁亨衢樗材歸里巷逃世友名
僧悟因繙釋藏三復招隱詩幽尋感君貺如彼鐘在懸動
聽湏扣攬天地頗寥廓吾生任俛仰

京師西山未得一遊大中丞德濟齋先生每一述之
輒為神往因成六言短律

爽氣欲浮雙闕神遊已夢十年若從甕山策蹇却勝鴛浦
乘船

霞豔連村紅杏雲深古寺白松欲尋十方幽境賴有一枝
瘦筇

浙

鷺宿芙蕖百畝鶯穿楊柳千株誰知太行風味絕妙江南
畫圖

碧瓦何王宮殿朱樓誰氏山莊常聞松風水峽不辨竹韻
花香

白石橋邊北淀玉泉山下西湖老漁隨意舉網野鳥自喚

提壺

曉峰云不減春風沂水之趣

萬疊青巒浸水滿村紅葉酣霜淀魚常依蒲樂鴈自為

稻忙

波影光搖朗月松花香度清風來青軒下樵叟裂帛湖中

釣翁

一綫蘆溝破白半腰潭柘撐青朝衣未晃金闕丹旭先射

銀屏

答朱吉士同學

故人貽我一行書，勸我加餐問起居。
賴有辭占堪玩索，更無憂懼可蠲除。
鬢斑騎省慵開鏡，齒豁昌黎尚齟齬。
媿朽株兼蠹蝕，無緣江上友樵漁。

良夜寥天雁破雲，隴西秋色正平分。
結交已值金將盡，行李惟餘硯未焚。
興到杜陵多感慨，悲來宋玉有奇文。
黃河濁浪東流駛，不欲緘愁寄與君。

題芭蕉

宮扇搖風翦綠羅，閒庭常障美人歌。
生綃寫出心偏卷，知是秋來恨轉多。

已未

哭王仲山副使五首

平生事業久堪傳搔首蒼天莫假年蠖屈乍蒙前席召蟾

虧不及賜環園余聞公被召以詩志喜云尺蠖豈常

峴碑湧淚傾河曲楚覲招魂動斗躔後死亦知文未喪羨

賈無愧到黃泉

看花舊侶公卿盡公以甲戌成進士同年如高安碩果空

餘剝復時水足三渠通惠澤公任寧夏司馬創鑿大賦均

萬井播仁慈公牧河州均田賦至詩書醞釀龔黃績婦子

悲歌召杜思如此老成竟凋謝省符遺恨獨遲遲故事引

官例須領咨忌者尼之故浙曉峰云結處

軍門萬里任持籌曾仗量沙巧婦謀千古論功推漢相一

時文網竟鍾囚公以潼商道為行營噶蘭大司餉者饋運

失期軍中絕食公召商販假貸支持旬月

以固軍心吏議
坐以賊八十萬
冰壺早博賢王鑒
獄時惟怡賢王偵知其枉奏免過半

玉節重紆
聖主憂
雍正庚戌再征噶爾特自命公隨范大司馬輓運西餉

是孤臣多命舛
臯蘭山畔旅魂愁

西通貢道起東山
雍正辛亥新設安西鎮道起公為副使
疆理伊吾締造艱

啟關草萊同甸服
撫綏回鶻護巖關
寸心有節徒辛苦
尺

水興波遇謗訕
痛哭長沙盈掬泪
玉門生入不生還

齒過懸車又四齡
尚堪宣力佐
堯庭廿年邊塞羸
頭白

一世功名待史青
屬國旌旄久遮幕
馮唐姓氏幸書屏
何

期上界需官府
箕尾騎回燦列星

秦鏡曲

占鏡鑄江心
清瑩比於水土花
半蝕識咸秦
曾隨弄玉歸

簫史神物二千四百載定然鑒物分臧否那知妍者盡成
媼照盡天下無媼施遮莫塵封久因多昏暗時昔聞蘇威
寶與月同盈虧昨夜冰輪過闇虛蝦蟆被蝕光無餘天上
清光尚如此匣裏青銅安足恃曉峰云寓
意深通

詠史

陶唐御寰宇佐治臣有五功德皆巍巍教養平水土蒼梧
雲不歸首禪及神禹天心次第來迭為三代祖衰周爭逐
鹿終為暴秦取暴秦力固強胡以受天祐乃知伯翳裔酬
庸亦應補惟有邁種奇秋肅非春煦以彼明允功冥福尚
不數矧傷天地和能逃鬼神怒

師有毒民象不仁乃興戎漢皇事耀武誇張四郡通李陵

宮丹詩集 卷五
既戰沒貳師亦無功糜費日斗金逍遙河上同徐福雖誑
誕漂溺僅嬰童豈若開邊釁海寓咸困窮天家侈富有備
物羅華豐葡萄及蒟醬野味何必充荒磧燐焰紫流沙膏
血紅寧以此易彼千古常蔽蒙

漢末黨禍起君子道當否中官傾朝紳株連陷北寺靈帝
方幼冲詰問魄應禡所嗟 隙明衆咻固難恃蔚宗據事
書昭鑒垂青史胡為清流人獨投濁流水

雜感

卷帙藏身似蠹魚近來請室更耽書一團生意心能種六
籍荒時筆可鋤玉塞無功幽太史茂陵多事渴相如燕巢
幕上身難穩賴有丹鉛尚助予

幾年絕塞鏡顏凋壯氣丹心未肯銷鄉月無情偏照雪朔
風有素慣欺貂臨州幕府逢羊狗北魏羊祉呼為天狗唐室中書用
李貓何處可求千日酒古今同憤一時澆

玉壘金城萬古雄濁流滾滾逝無窮天心未泯子卿節人
世爭讒充國功詩思久拋花柳外邊材半耗鼓鼙中平生
懶讀西夷傳得失相乘慨塞翁

知非轉盼屆遽年湖海飄零只任天劍佩西京成昨夢詞
華東觀俟時賢種瓜不識通侯貴射虎誰為故將憐咄咄
書空真器小滿懷風月尚依然曉峰云不怨不尤至此方是真學問

致身無術本踈空落寞乾坤道不容鳳翥鴻騫乘氣運牛
羈馬繼任遭逢素書讀罷見黃石紫塞歸來憶赤松為羨

扁舟五湖裏烟波淼淼憶高蹤

鷗飛蠖屈任紛紜掩卷欷歔感舊聞虛室生風驅野馬遥
天翳日駐浮雲盛時曾下蕭周獄戚里虛傳衛霍勛人定
縱由機巧熟豈當姚姒喪斯文

寄謫居御史王崇魯

鐵冠御史薑桂性與俗雖殊獨守正世人欲殺天不從達
者夷然自安命應劉載筆蓮花紅紫臺贊畫多奇功將軍
大抵皆黃祖乾坤落落誰能容辛勤嚙盡天山雪間道歸
來復朝列數載謗書盈

浙御床

先帝深恩難具說

保全更借上林枝且令為郎服衆疑胸中抑塞氣漸吐矯
翼青雲會有期於時賤子寅恭協青綾粉壁芳蘭接省闈

春容臭味投梁園朱邸更同遊
回憶清歡未匝歲一麾俱
出就鳴騶我度渭南筦漕政
君來幕北掌軍謀埋輪叱馭
驄馬壯王人本序諸侯上長
揖何妨抗閭元吐衲不懼嗔
丞相那料夜郎偏自大藐茲
使節乖嘉會風水相遭激石
磯遇忿難蠲遭構害鋤蘭煮
雀逞老拳北闕 君恩中

住道使昌黎嶺表傳十年荏苒
墮南斗惓惓忠愛詩千首
春至還看鄴杜花秋衰尚詠
灞陵柳我邁酒泉司贍軍愧
乏良猷踵君後啣尾輜車接
塞垣羸糧足備三年屯巨細
悉稟 廟謨出匪躬蹇蹇寧足
論鼎湖龍去浮雲幻銀漢
倒流星宿翻方今 聖德寬如
海見現水消自可待干

里相思脉脉情西風吹雁竟長征蘇李五言空掩淚望斷

關山寒月明

曉峰云結處情深于文

棄婦歌

館

簾門寒女賦天桃十載宜家琴瑟調谷風陰雨遣妾去應
是蛾眉有詠謠事夫疇不願偕老狂飈撼樹鳩離巢憶昔
穠華真窈窕雁鳴旭日冰初消禮成堂上拜姑舅寶愛新
婦如瓊瑤縹絲織錦盈筐篋御冬旨蓄曾劬勞一朝覆水
收不得鄰家肯信冰霜操小婢賣珠無善價荒山補屋披
菅茅啼痕漬枕夢歸去髮髯新人吹鳳簫

惜春詞

曉峰云脫盡惜春套語處處生新即置之長慶集中不過爾爾

千古人情盡戀春共喜春來惜春去除却風光艷冶待更

欲尋春在何處紅稀綠暗近朱明揮戈繫繩留不住春來
住九旬春去別九月縱有離恨心譬若遊胡越一年一度
一歸來有情依約不須催殘臘未融西塞雪東風又綻南
枝梅春來春去如過客俄見朱顏變頭白古今人卧北邙
多泉臺杳渺永相隔只有長春閱盡人惜春還被春光惜

庚申

圖

春風

一百五日愁中過四十九年非始知翟尉門前羅雀處子
雲亭上草玄時風來簾幙疑花信潤及琴書見雨絲跼脊
不嫌天地小樊籠飲啄也相宜

曉峰云此處困而亨本
事神怡氣靜飲啄自如

投督學嵩詹事

闢門巨典隆文柄天府名邦 簡大賢德輔青宮尊保傳
教敷紫塞徧陶甄雪山曜日冰壺朗仙掌披雲寶鏡懸每
為孤寒梯進步肯將辛苦負當年體裁雅尚韓歐正訓詁
常推馬鄭先豐鎬鼓鐘千載盛召周竹帛二南傳承華乍
仰鴻文麗台曜還看駿望騫憶昔締交皆弱冠維時弄翰
已佳篇靈椿高蔭五枝桂學海澄波萬選錢東閣下風欽
博雅西園愛客每流連晴窓品第端溪硯月夜操吟淥水
絃蠖伏馬門猶握槩 龍興藥榜快先鞭猶憐薇省添香
史常羨蘭臺視草輒肝膽一腔期報 國圖書數卷漫籌
邊輪蹄滿磧通蒲海芻粟屯雲駐酒泉 廟算恪遵偏獲
謹軍儲有備却成愆 堯階共慶排干羽吉網猶教納橐

餽默玩六虛占悔吝閒尋四庫重鑽研怨尤欲泯天人外
榮辱難超倚伏前枯坐將穿管氏榻著書擬拍子長肩已
成折鼎傾公餽妄冀勞薪辨爨烟喜有慶霄當 盛世定

垂五色照沉淵

苧村云七排難
得瀏漉若此

楊花

春去已旬餘誰來報索居多情惟柳絮宛轉入吾廬颺雪
疑催鬢因風欲坐裾與君共飄泊惆悵意何如

歸愚云婉
轉關情

浙



浙江圖書館

寓舟詩集卷之六

秀水沈青岷良思父著

辛酉

館

題同學朱吉士東籬草堂圖

吾鄉傍南湖編籬亦幽雅中有一處士種鞠草堂下療飢
不折腰采采動盈把讀書得其意哦詩和者寡高懷誰與
同蓮社惠休寫髯雪裏幅巾神清自瀟洒

苧村云淡
逸多姿

為安西兵備常可園副使題觀苗圖

雪山高高千仞東有疏勒西黨河原隰昞開大鎮塞垣
客戶驅犢耕火州回紇隨田峻玉關萬里繪豳風芄芃盡
沐郇膏潤都護行春來劬農油幢皂蓋五花駿頑苗既格

烽平安南薰度磧佐虞舜嘉瓜引蔓綠玉長葡萄十斛鞠
脛進使君顧此心神怡為倩長康寫丰韻然明治績誰與
儔展玩斯圖殊可信

館

鉏蕭亭

我本長劓客蕭坪劇可耕皋坂下南原莫教閑白日猶勝

曰蕭家坪

名 劓黃精惡艾先鋤去良苗晚待成誅茆聊憇足敢擬草玄

猗香閣同吉士劇談

天涯遊子本相親况是當年硯北人自比燕巢營客裏每
思魚樂話湖濱三春花鳥誰為主千古文章自有神斗閣

登臨壺欲缺蕭條環堵不憂貧曉峰云三春花鳥一聯有神

詠向日葵

滿院秋風斂嫩黃，扣槃捫燭望恩光。
跋烏萬里誰知汝，猶

自西傾倚夕陽。

歸愚云：工於用意，猶江潭之屈子也。

和郭山樵平涼道中望崆峒山

杳靄迎人使節中，集靈隱隱倚崆峒。
隴雲靄黷迷蒼鶴，涇水滌洞護竹宮。
驄馬遙瞻螺黛影，牙旗先受翠微風。
豈緣訪道耽仙跡，應是環滁六一翁。

初購拂廬偶成六言排律

行吟試開心境，非是卜居興賒。
一簞一瓢風味，半村半郭人家。
朗懷正可邀月，老眼猶能看花。
葱蒨叢中雨細，呢喃語裏風斜。
老農分香受水，稚子壅土栽瓜。
官道蔭來楊柳。

隣牆鞭透蘆葭南榮鋪虎邱席北垞瀾龍井茶隨意自消

永日却忘身在天涯

第四本袁凱句成章後乃覺

○歸愚云體新

內府詞三十首

館

吾鄉朱竹垞有十家宮詞一刻哀集唐宋以來詩人

備述宮中情景然非身在宮庭言之未必親切而雜

以哀怨望幸之音尤非所宜憶昔

青

居輦下濫廁

武英殿纂書又考選

北上門教授

禁旅子弟得聞

皇朝盛軌超軼曩代濡毫追詠以志太平且補會典之

不逮俾載筆者有引据焉

天上星垣衛紫宮內朝不與外朝同一編周禮精微處盡

在七司三院中

三殿清寧交泰重左邊景運右龍宗棕鋪寶座金橋迴

太和殿柱三十六中間四柱盤金龍寶座以棕繩織之四面俱有金橋拾級而登座上懸軒轅鏡一枚袞繡

班齊兩觀鐘

館

積翠堆雲白玉砭波搖太液漾晴窓蕙花遺葉香風裏無數鷓鴣瀉瀉雙

海澱初開御院時暢春園擴靖明規國朝初建靖明園後展為暢春苑

天家棟宇無雕飾不信蕭侯壯麗辭

大宮日直上三旂內務府鑲黃正黃正白三旂佐領三十員內管領三十員每日一員輪直一月

而天膳精調後左闈御膳房所在勅賜傳宣擎克食

國書克食恩也每膳必宣賜黃瓷碗裏飫鮮肥上所指授

學士宣來校御書金蓮燭朗澹寧居周髀算數義爻

理狗監何能誦子虛

深宮祈福不由巫

大內日跳神傍晚馳送背燈肉於苑中然後西直門閉謹魚鑰馬博碩

牲牢出內厨

猪極肥大高有尺度會計司徵諸畿內庄頭烹宰亦用內監不由膳房

卿尹一

時齊賜胙小刀自片雪花膚

養心秘殿百工齊

御製般般入品題琮琥畫從陶冶

出更霏雨雪灑玻璃

玻璃有明涅二種色則五采備具亦能燒造金星者名噶什倫其雜色者

名雨雪玻璃

不備宮官九品階只聞答應號軒齋

本朝後宮人數之少實超前代妃嬪之下

有大答應小答應秩視古才人外庭不得知姓氏惟聞回芳榭等名色而以一號二號為次序然亦不過數十號而已

吉祥門上供傳買阿監何由得上街

包衣衙門每歲派商人值年

蜀錦貂檐稱體裁不辭風雪跨龍媒葡萄馬乳金螺吸曾

奉官家哨鹿來

晚峰云落落大方

萬國鶯花

聖壽辰普天樂譜一番新周文百子齊稱祝

角趾振振識瑞麟

館

建藩甲第各齊雲桐葉毛聃幼未分為請闕睢何處詠鵲

橋先許度南薰

殿在武英之南凡未分封皇子大婚俱在於此

七萃三驅護

至尊豹鎗隊後屬車屯迎

鸞伏地關防

過靜聽康莊萬馬奔

大駕後衛騎雁行兩翼而進如有接駕官員趨避不及者衛士守之令

其屏息伏地俟屬車過盡乃起

典禮中宮翟第端鳴琚贊導女桐官

桐引官周禮有桐馬皇后遇朝祭大禮先

期傳派包衣命婦嫺習儀文者為引導

數珠三串橫肩掛耀月東珠帽頂攢

婦女數珠與朝官不同以三盤同掛其一居中兩腋各斜掛其一至東珠帽頂惟和碩固倫公主格格乃得按品級

用有
差

殊方貢獻 特恩頒常賜年年按品關局庫烏林司玉府

須知良貨備多般

館

八旗秀女及笄年額髮低分顰翠烟滿粧處女分髮向鬢則低端為龍

孫行采擇慈寧 聖母特傳宣

四姓勲封幼插貂綠頭牌引 御前挑記名若得乘龍選

入選者牌
子留中 白馬金鞍分外驕

賜翎被蟒理藩教蒙古淳風尚燧巢四十八旗齊屬國金

鑿飾耳
器 台吉眼猶宵 **浙**

長白山同天作高關東漁佃信神皋牛魚鹿尾天邊味不

羨周官體薦牢

針線房中生活多即尚衣監對花裁樣費摩挲晚來下直黃扉

外三寸罽罽戴巨羅元世命婦首飾罽罽有高至尺外者本朝常服織絨籠紗為之名曰罽子

保德搥冰進石花六安春雨焙新芽 天朝恢擴輿圖廣

臺島流沙各貢瓜臺灣隸版圖後以榆次西瓜種種之極佳歲正月進哈密回鶻瓜以白露日摘

可久藏

湔袞入月渚虹長昨夜西宮叶夢祥各院未嘗湯餅宴內

倉先進黍稌糧內宮月米各色具備皆以小斗黃封進之

楓宸淪茗鬪旗槍釀乳何須入鼎鑄昇水惟差副管領玉

泉山下碧波清副管領二包衣大也昇水蘇喇在前管領乘騎不敢逼近以避揚塵

日移花影過 彤廷御六天行政九經旰食尚開西暖

閣自鳴鐘響 聖人聽曉峰云本朝勤政起越前代此實錄也

韶武從來古樂稱那知蟒式德容增蟒式本朝樂舞名其歌以國語自合音

韻開基農事干戈定却似周家聖聖承

塘灤霸州水泊名烟波百淀投龍船簫鼓振中流義魚簪鼈期

門勇為陋橫汾宴未休

剪綵為花瑞氣森珍珠瓔珞滿筵簪吉祥頌語依宮樣一如

人有慶萬壽無疆之句每牌長不盈寸青曾書之小楷恭書蘸乳金

爆竹桃符色色諳圖形列宿與天參故事宮殿春聯俱以素綾楷書門扇圖二

十八宿神將真形懸掛屏幅填倉日收藏銀幡綵勝前規陋 賜福殊箋記美

談

浙

武英秘殿萬牙籤恒壽齋中梓印兼設監造蒞事 窳砌浴堂今

不御浴室前明舊物石文都被墨痕淹

萬歲山巔樹柏搯壽皇殿上

御容嚴起居膳樂如常

日風駕雲旗陟降監

壬戌

館

題黃芑山大參酒泉圖

舉世多曾繳咸拇觸荆榛維心闢靈境得地回天真昔與
之子共蹇蹇匪躬臣雪山生陰暄蘭茝棄澤濱所幸一潭
水未為糞壤堙荷鋤躬攘剔築室堪避秦暇日嘗習靜興
至亦留賓坐忘夷與險融融如飲醕披圖見渥赭恍晤素
心人剝盡還復來尺蠖能屈伸寄言潭濱老理數常乘因
把琖且自酌毋為鬱茲辰

又題

富丹言集 卷六
泉之清可以濯纓酒之聖可以適興挹泉為酒君子之有
吸酒如泉聊樂其天我從戎幙入塞來忽見亭臺倦眼開
蘇公柳名伯棠名勝晦久今復光吾友於此悲歌慨慷功
高定遠憑吊望諸姑隨遇而寄託豈歸田之遂初

壽闔老七十二歲

三原人

右相家聲養德醅世居焦獲葛天民庭中自餒栖松鶴
上時挑漉酒巾清峪波澄堪濯足終南路近好尋春古
稀漫道前年樂鼓缶行看大耋人

冬夜擁爐偶憶丁酉誠邸以賦得禪房花木深為題
試在館諸同人凡百篇王總評云諸作非不工於摹
寫然有禪房而無花木者有花木而非禪房者縱或

兩般都切而脫却深字終為探驪失珠頗中評選之
法儂指將三十年矣人徃世易原詩亦俱散佚乘興
補之以志今昔之感

萬卉成叢處應推祇樹林幽香生丈室艷相定禪心幢影
偏招蜨魚聲似和禽誰能探兜率天女獨來尋

金城關

圖

大漠連西域孤城一綫懸據津新省會

甘寧巡撫以康熙五十年移駐蘭州

設險古烽烟榆谷營平壤虹橋博望船柝鼓邊月落雞唱
朔風傳不詰素縑客惟迎紫氣仙徃來弛啟閉琛貢任于
闐

聞監軍道李瞻仲

錫秦

平粵西蠻擢授臬使

小范老子吳中英詩書醞釀百萬兵於今誰得繼盛軌希
文之後惟膠城公昔負笈來日下十年祿閣同嚶鳴文章
商權入肌骨兩家互作月旦評偏師奪幟掄魁選花縣旋
分墨綬榮人言象郡風土劣公獨叱馭氣縱橫天涯判隔
萬餘里卓魯善政馳令名但見薦牘稱五美刺州守郡頻
遷鶯曩昔惟知學術茂何期仕宦亦崢嶸邇日客從桂管
至自言曾佐伏波營知向河湟垂問訊歷道索米締交情
龍門鯉躍難南徙衡浦雁足非西行遂使故人消息杳一
朝訪舊隔三生初時尹縣具膽識不置村鼓讐盜平獠刀
籐甲各斂戢威懷父母如神明瘴鄉次第歸版籍援獲之
性猶相爭徵貳鼓衆夜郎大誰歟能擊諸葛鉦於時武安

分旄節盡護諸將搯權衡借箸為陳蠻狡狴任翦用衆可

殲鯨尅期一月悉埽蕩毋使糜餉歌在彭龜貅調集乍傅

壘譚帥廣西提督譚公行義援袍利速征監軍躡足且莫進主客勞

逸審貴精疇昔小挫足為鑿旬日情歸湏潛偵元戎大智

善聽納九天奮擊雷霆驚么麼醜類遊釜底至今離江長

澄清捷書先奏
龍顏喜
三錫獬冠酬月卿我聞

述事重歎息天工人力有虛盈予持鉛刀冀一割塞垣士

馬無呼庚供億出入秉
廟謨忽來譴責烈禍攫靜思

過愆何以致才小任重鍊必傾服公雄略羨公遇遊刃導

竅舉重輕我願從君學跬步庶幾得履天衢亨

題鄂秋村中丞相馬圖

秋旻初拭玻璃淨萬里風雲愛神駿持節西南負弩驅巴
寶果下匙才寓金紫光輝出上方便蕃應卜康侯晉傳呼
廐吏試牽來玉花乘黃氣交奮耳削蹄輕寫特佳展觀欲
贈丹青引世間不乏騷裏良誰歟賞識惟孫陽權奇磊落
如國士長楸屹立增昂藏埒邊芳草含烟輒砌下秋花帶
露香老成鎮蜀韋城武悉力籌邊李贊皇宣猷布化承平
日頗見恢恢遊刃長齋前運甕寸陰惜江漢歌思愛袞烏
詩書不負奕葉簪醕篤尤光累世澤渥洼之產汗血材郊
廟諧音天馬來會當繼美青箱業義馭乘風閭闔開

癸亥

客有述百泉佳景者忻然神往援筆記之

泉源風人詠積流為衛河右與淇水會入濟增洪波舟行
吳楚便漕輓究幽過惠農分五閘灌溉生嘉禾支渠綠疇
徧西成美利多上有蘇門山鬱葱結深秀旁有安樂窩蓬
蒿隱遺構參差翠滴衣來往雲封岫霽色辨烟禽夜深聞
月狷一源百穴噴聲沸如星宿虛亭觀蒙象珠跳并玉溜
農家五畝宅俯仰樂有餘桑柘翳環堵鷄鶩敞廬園抽
盈把筍池蓄徑尺魚麥種播秦正秧針插夏初歲功得其
令夫豈邊塞如因之江海客退休多卜築執業事釣樵忘
機友麋鹿有土頗可耕有書還可讀扶筇偶詠觴得侶或
風浴奚啻懷葛民悠然生事足我聞長歎息胡為仕宦遊
升斗迷本性忠勤羸梏囚改轍苦悔晚買山乏良謀既慕

孫公嘯鸞音千載留復愛邵子學契易遠百憂永懷兩高

躅身世輕浮漚

曉峰云百泉山水在咫尺間一覽而盡前賢遺跡亦多荒廢昔有客告之東坡為之神往先生亦然

怨歌行

館

裂紈製團扇用在炎暑旺秋風宜卷藏扇胡不自量修正
未蒙福為邪欲何望善哉班姬言厥心豈惆悵人因燕啄
讒爭憐長信養終身免人彘猶是君恩曠

隴西行

西遊積石洪河湯湯載懷博望大夏廻翔喑人功名何往
不立而必窮邊鄰鬼呼吸上之回中王母會同雲輶芝蓋
縹緲仙蹤崑崙咫尺招招八公傳我毛羽騰蹕罡風顧見
枯槎載浮清漢拊掌大笑光華復旦

苧村云有漢魏風骨

飲馬長城窟行

長城三千里征戍賦采芑塞上一交鋒勝負皆有死代郡
古良將號曰武安君清野無所獲胡兒自北奔廟堂乏長
策歲發防秋役南畝減丁男荒磧注軍籍彎弧著鐵衣曰
歸逾瓜期聞道貳師部直過臨洮西秋風擣砧夜少婦涕
綆縻

次韻漁舟晚棹

榜歌漁唱夕陽天楚尾吳頭意每牽一領綠蓑孤棹雨半
枝青篠九峰烟行藏常羨嚴陵得醒醉惟應屈子傳倘有
柘湖能寄興蘆花深處正堪眠

恭和

御製落葉韻

榮枯物理悟因由，謾謾辭林計。莫留墜後，每迎鴻北鄉。飄
時先共火西流，銀河斜界方。鋪錦金井高柯，忽報秋屐響。
空山閒踏處，一番搖落動人愁。

不是春葩滿樹紅，也隨天女散晴空。雲間埽去粘僮帚，江
面飛來打客篷。驚鵲亂棲憑朗月，伴螢斜度任輕風。虛房
寂寞塵生處，慘淡書情麗竹中。

曉峰云慘
淡經營

鶴警林梢傷客心，僧房樵路幾層深。棠梨已染沉酣色，松
竹猶留積翠陰。簷眉蛛絲渾欲舞，砌埋拳石渺難尋。夜來
撼撼增清籟，啟戶方知樹裏音。

一曲秋風氣候殊，清商催墮在斯須。哀蟬抱處聲聲咽，急
杵敲來片片無。為愛晚林曾駐馬，偏宜枯幹好栖烏。縱教

解籜辭枝去看取明年復滿株

曉峰云善于用意而筆能達之

黃隕無情可奈何山陬水曲聚偏多乍封苔砌知微脫亂

點萍洲值始波此日重局依瘁質何時百卉改青柯閒來

拾取煨爐火却勝漂流萬里河

曉峰云起結耐人咀味

羅袂無聲識早秋麗娟歌罷滿堂愁柳疎灞岸登高客楓

冷吳江送遠舟櫂老尚堪充側理桑枯無待捋毗劉蓁蓁

美盛還衰謝起滅渾如海上漚

曉峰云次聯超脫

恭和

御製消夏十詠

存四

扇

舜日五明製南薰動蕙叢捉時當暑熱藏去任秋風蟬翼

迎颺舉冰紈映月空却暄仁惠溥黎庶慰來同

螢

宵行明燭火飛渡照波激數斛應欺月一囊堪代燈入簾
知雨冷褰幌訝星增飄泊巫山夜微輝愧爾能

冰

凌室乘時啟鏗然聽折冰履霜宜早辨見晁豈終凝治鑑
官無替雕工巧莫憑玉壺心共潔茹藥記先曾

雨

長養憑優渥甘霖徧萬邨天心誠可格 帝力已忘言渠
堰清流漲郊原綠穗繁灑時驅溽暑爽氣浹晨昏

祝總督馬虞尊六旬壽起句用公自製詩

甲子初周又入秦年年紫氣耀輪囷錫圭本出姬姜裔分

陝還同周召親拓宇又通蒲海貢乙卯夷使款塞命護

羌常使鄯湟賓壬子癸丑駐西寧辦青海夷情事務油幢直指三邊肅赤烏

遄臨四國馴遠略漫教推博望淵懷何必數平津罕聞荒

磧蠶叢闢喜見流沙雉堞新公為吏部郎曾使西域建安西城虞芮息爭

平似水蒲朝定界昂參傷化斷如神審鞠杜濱娶部民女秋月為妾之案皇華幾

度諏諮徧板屋頻年詢訪真即墨被讒經暴白昭雪張嘉翰誣告兵

備王公全臣案然明著績宵陶甄仁風普扇黃圖外威望遙加黑

水濱列服會同昭帝治諸侯弁冕序王臣分疆攘外

尊周室互市招携靖塞塵偶染華箋稱逸品每吟佳句輒

驚人乍臻邕桂南邦式屢越關河西鎮巡列戟風清榕蔭

茂褰帷惠浹海隅春檣烏趁舶濤衝雪竈火熬波月耀銀


羽扇一揮清瘴氣
 蜺旌再蒞慰鮫民
 彤弓寵茂槐音近
 玉帳勛高相業醅
 七葉貂蟬鳴鶯鶯
 滿門鐘鼎畫麒麟
 黍苗膏雨勞郇伯
 為賦崧高祝甫申

九日

半生客裏過重陽
 屈宋襟懷劇感傷
 塞上茱萸迎露紫
 關中蒲柳望秋黃
 鼓鼙聲歇孱顏老
 秔秠香濃壯志荒
 淺醉龍山休落帽
 彈冠大業正茫茫

曉峰云氣
味醇厚

浙



浙江圖書館



浙江圖書館



浙江圖書館

借書勿忘還期以免過期罰金
(目七)

浙江圖書館

811.17
3452

125058

~~160905~~

浙江省立
圖書館

借閱者注意

浙 江 省 立 圖 書 館

- (一) 借閱此書須加意愛護勿失原有形狀
- (二) 損壞或遺失應照原價賠償
- (三) 借閱以二星期為限期滿應即繳還遇必要時得續借一次
- (四) 逾期不還須照章繳納罰金
- (五) 此書如值需用時本館得通知借者須即繳還

(目五)




浙江圖書館

Blue Cyan Green Yellow Red Magenta White 3/Color Black
© The Tiffen Company, 2007
TIPPEN Color Control Patches
Centimetres
Inches



811.17
3452

浙江圖書館



TIFFEN Color Control Patches

© The Tiffen Company, 2007

Blue Cyan Green Yellow Red Magenta White 3/Color Black